

"ТАЧАТ ИЛА АКПАТЫР ОН"



5 октябрыште Морко рудӧ книгагудын пашаенже-влак, сылнымут шӱлышан «Тачат ила Акпатыр он» шарнымаш пайремым эртарышт. Тидлан амалжат кугу: С.Г.Чавайнын шочмыжлан 6 октябрыште - 134 ий. Сергей Чавайн марий литературлан негызым пыштен, шочмо йылмын моторлыкшым, вийжым ужын, тудым ончыктен моштен.

Вашлиймашыш Морко 1-ше №-ан школын 6-шо ден 7-ше классыште тунемшыже-влак, «Морко памаш» кружокын ветеранже Галина Васильевна Кузьмина да сылнымутым йӱратыше-влак погыненыт. Мероприятий жапыште вӱдышӧ-влак презентаций гоч С.Г.Чавайнын илыш корныжо, усталык папаж нерген каласкалышт да сборникше-влак дене палдарышт, а йоча-шамыч, шкалан келшыше почеламутым ойырен, йолташ-влак ончылно йонгалтарышт. Вашлиймашке погынышо-влак «Мо? Кушто? Кунам?» модыш дене модыч, тыгак «Акпатыр» спектакль

гыч ужашым моткоч устан ончыктышт, С.Г.Чавайнын лӱмжым нумалше литературно-этнографический комплексым пазл гыч шымлен погышт.

Жап эртен гынат, С.Г.Чавайнын почеламутшо-влак мамык гай куштылгылыкышт, памаш вӱд гай яндарлыкышт дене чоныштына илат, йыр улшо тӱням, ен-влак кокласе кылым, пӱртӱсым шымленрак ончалын, кажныштыже ямым ужаш, шижаш, йӱраташ таратат. Классикын почеламут корнылажым кучылтын, «Ешартыш корно» конкурс эрталте.

Вашлиймашын участникше-влак «Вуйыштем шовычем» почеламутлан кельшта-рыме мурым тӱшкан шергылтарышт. Конкурс коклаште Людмила Александрова сылне мурыжо-влак дене вашлиймашым сӱрастарыш. Галина Васильевна почеламутым лудо да мурым мурыш. Кажныже поэт нерген поро шомакым ойлыш.

Илымына годым ме тудым шарнена, а мемнан шарнымаш вес тукумлан кодеш. Тугеже кугу мутмастарна нигунамаст мемнан деч ок ойырло. Вашлиймашын тӱн шонымашыже – самырык-влакым С.Г.Чавайнын творчеством деке шӱмандаш, тудын гаяк пӱртӱсым йӱраташ, эскераш, пымлаш да шке ужмым возен мошташ кумыландаш. Кызытсе йоча-влак коклаште тыгак чолга, мастар поэт шочеш манын ӱшанаме шуэш.

Людмила АЛЕКСАНДРОВА,
библиограф